

中國近代文學叢書

上海古籍出版社

東洲草堂詩集

下

何紹基 著

曹旭 校點

中國近代文學叢書

上海古籍出版社

東洲草堂詩集

下

何紹基 著

曹旭 校點

東洲草堂詩鈔卷十五

重謁三蘇祠

用雪浪齋三字爲韻。乙卯

眉州初來時，快雨奪奇熱。今乘春和至，一雨寒過雪。新水遯未生，苦竹暗成列。荔子穉難花，柏榦凍似鐵。回思全蜀游，江山粗可說。惟有三蘇祠，時時夢魂結。翩然復戾止，渴思兩年泄。三子如有靈，爲我屐齒折。今人友古人，古賢友來哲。定知象外交，非以今古別。求友半生勤，多聞直與諒。徧交當時豪，神志獲夷曠。區區尚友意，遙集千載上。顧於雪堂叟，意氣尤相向。人世輕一葉，落筆追萬狀。胸中頗坦平，形骸成放浪。今欲一斂之，何處乞師匠？老泉肅而整，穎濱靜且壯。是可藥吾偏，重來副微尚。

當日紗縠行，今日試院街。士氣頗樸茂，布韞而青鞵。叩以三蘇文，十問僅一諧。時以三蘇文問策。別後何所學，令我增慚懷。頻年苦兵役，間左詘生涯。無乃硯田荒，坐令初志乖。今當洗兵馬，宇宙復清佳。勉哉勤訪閱，期與古賢儕。古賢幸非遠，老柏森庭階。是德有鄰堂，與思無邪齋。

不晴不雨悶甚與幼翁棋罷忽聞雨聲喜而成句

靜院嘉州潤上衾，江山雖好苦長陰。快拚鏖下棋敲碎，喜聽階前雨滴深。南北捷音猶緩，春秋佳日易沈沈。草堂詩老緣何事？夔梓淹留費苦吟。

游凌雲山前一夕細雨不止占請諸君子和

嘉州風物極清森，萬景亭前快俛臨。十日盤桓雲養氣，連宵啾唧雨談心。山容澹處畫難到，花事遲來酒緩斟。一醉拚將天悶破，明朝奇勝共登尋。

同諸君子游凌雲山歸小酌萬景亭用前韻

回憶前時鎖院森，捫蘿無處可登臨。偶然結構一亭子，便有超遙千載心。別後好山招手到，公餘閑酒看雲斟。嘉州果占川中勝，游趺何緣許再尋？

小山星四夢九三君子以歸秦鄉試同日俱發適見壁間有顧朱兩丈題
畫梅唱和詩輒用其韻贈行余方以言事謫官意欲卜居終南山兄

許爲留意故有末語

離筵高張酒無旨，何堪一別三君子。莫愁畏景歛塵飛，正要安心冰雪裏。三年同我使車行，雲龍追逐無時已。甄文校賦疾如風，妙畫奇詩森滿紙。笑我將如退院閑，諸君方卜登場喜。讀書事業期許同，支拄時艱後先耳。夔門峽窄灘如龍，邛海天高月生水。此外江山屈指難，羨子先余出蜀矣。杜陵茅屋涪翁池，蓋非得已乃戀此。偉哉坡穎兩詩仙，達觀不道歸鄉美。爲問藍田鄠杜間，買宅結鄰果誰比。

苦雨喜晴柬黃壽臣制軍作時乙卯六月廿六日

風聲招不來，雨聲麾不去。三年游漏天，此漏未嘗遇。我屋十餘間，笑啼環婦孺。移榻時苦煩，頽牆夜尤怖。長街成斷港，水急無處注。何況窪下區，波瀾沒荷芋。南望新津橋，北望趙家渡。人有其魚殃，田廬尚遑顧？大府惻然感，率屬禱以步。一日清風生，二日愁霖

住。三日大開朗，初陽紅滿樹。想見郊野中，昂頭仰羲御。誠求宜獲應，謳頌傳行路。卻聞渝涪間，仍多苦旱處。米價日騰躍，民氣尚焦遽。吳楚久用兵，農器無時鑄。吾蜀幸安晏，徵索煩財賦。天時乃若斯，每飯屢投箸。

將游峨眉

忝與持衡古益州，鋒車巖壑任狂搜。西山邛海天多暖，劍閣夔門氣太秋。使節三年圓一夢，被議時科試適畢。奇峯萬點洗雙眸。謫官愈識君恩重，許到峨眉頂上游。

登舟

游徧蜀中山，恩數重英蕩。郵程所不經，幽境難入賞。峨眉雖特奇，西顧在佛仿。嘉州凌云山可望峨眉。幸卸使者符，得遂名山想。非吏亦非民，官場酬應強。狂哉蜎鹿性，飛動入蒼莽。徒步出東門，矯若魚脫網。江湖萬里心，翩然落雙槳。

【校】

「方苦囂」，《峨眉瓦屋游草》卷上作「忽苦囂」。

塵事方苦囂，遊興偶然作。不令兒輩知，敢使先生覺。吳叟童子師，靜傲如幽鶴。顧子詩人豪，青城滯行腳。王郎跌宕才，行就川南幕。晨興不暇別，孤蹤成落落。酒杯幸無空，棋枰尚堪著。寄言謝不敏，秋齋念蕭索。此游臨行，始令兒輩知。黎明即行，不及與吳壽恬、顧幼耕、王梅谿三君子別。

久不作小字舟中試爲之

平生小真書，古意頗有得。嬾慢漸不禁，求索常苦逼。終日蟠蛇龍，何曾入規式？江行意無在，明窗動靜墨。吾臂如生駒，未肯就羈勒。蜀舸如怒蛟，鼓努敵水力。兩雄不相下，點畫難識職。吾聞草聖書，精詣在楷則。又聞魯公書，橫平而豎直。坡老灘行時，作字適忘適。於彼乎何尤，握腕自歎息。

晚泊知眉州青神俱已過

眉州三蘇里，青神三巖寺。我游已再經，吟燕劇閑恣。舊夢冀重溫，新詩或增異。昨日離成都，水淺煩篙刺。今晨出江口，馮虛聽所至。僕子勤酒杯，先生成午睡。百里好江山，翩

然已超厲。迴思坐悵惘，看到晚嶺翠。

奉懷周執庵丈

乾嘉之際事深諳，前輩風流入劇談。閱世老懷增澹蕩，容吾狂態任清酣。前宵樽酒猶同把，今日奇峯讓獨探。歸路仙雲攜滿袖，桂花香透子龍潭。尊庭應秋試者十餘人，子龍潭者，所居處也。

嘉州郡齋酒後作

江空孤舟懸，峽窄猛雨聚。天明聲漸稀，茫茫向煙浦。舟人不蓑笠，篷底漫搖櫓。早飯泊嘉州，二李相延佇。雲生太守、翰卿大令。好事太守賢，披豁肝膽吐。醉我荷花前，紅雲紛笑舞。中有玉雪姿，離立自娟嫵。驟雨忽復來，急似催花鼓。迴思兩度游，隨車傳好語。今懷轉超然，漸欲忘官府。行將秉耒去，東洲老農父。

雲生太守款留一日由淩雲山回醉後作

讀書千載幾東坡，又泛扁舟訪薜蘿。異樣雲山嫌入畫，殢人風雨耐聞歌。石門翠墨蒼寒

甚，樂府新聲激烈多。古抱今懷都放卻，酒闌獨步看明河。時見贈《石門頌碑》及自製傳奇四種。

登萬景亭

亭在嘉州試院，余歲試時所構也。

斯亭好結構，招徧隔江山。萬景本來有，一時相與還。鶴蹤浮盪盪，鴻爪印閑閑。此別成揮手，回頭夕照殷。

方響洞

本名丁東水

自從此洞名方響，好事爭傳山谷翁。聽到天然清妙處，何如仍舊號丁東？

晤峨眉令秦少芝丈

閑雲偶然出，嫋空亦自奇。二客竟不從，游趺何遲遲。俞麟士、郭藕舫約同游峨眉，皆未至。咄哉逸士蹤，乃被山靈知。先令宰官至，免誚北山移。

峨眉縣齋贈秦丈

壬辰年欽賜舉人

邂逅秦丈人，先德我能記。惟先文恪公，家學慕沙嗣。詞林根氏厚，三天久直侍。先皇念舊學，崇銜兼美諡。立傳命史官，賤子與譔次。竊惟名德崇，久服朝野議。乃因追贈隆，始獲簡編廁。純廟垂遺謨，伏讀增感企。小臣雖有言，大官老於事。安得歐宋才，重尋馬班例。余提調史館，見高宗命辦三品以下列傳之旨。欲掌院奏請補辦，不見允。因辭提調。

丈人稟庭誥，世賞慶方延。名山宜有主，管領得才賢。氣挾湖海遠，操比金石堅。藹藹酒邊話，儒雅集聯翩。陳乙齋同年、張春泉少尉同坐。寓我古柏堂，鐵幹踰千年。高蔭入雲霄，新月來相穿。古柏不在地，新月不在天。微涼動秋服，金風來颯然。夢魂化爲鶴，飛上峨眉顛。

出郭

行出南郭門，稻露晴不乾。山煙迎客來，縹緲如旂檀。步過老竇樓，萬樹森相攢。清清瑜珈河，積雪化波瀾。想見未化時，積素扛雲端。虛空入無上，天體萬古寒。山容睡初覺，沈霧滋團團。惟有最高頂，初日倒浮丹。

虎谿橋

足迹未到心先超，一山靈氣紛相招。幽奇古異萬籟合，惟有虎谿谿上橋。想見禪師騎虎過，山月低時笠子大。泉聲迸飛樹光破，驚墮懸猿四五箇。

伏虎寺飯於嚼雪堂

峯峯樹色轉，澗澗泉響異。鳥語鏗有棱，草香濃可醉。歷磴快欲飛，徑陟雲際寺。層層閱殿閣，頗覺耳目闕。西登嚼雪堂，萬景遠來至。雲山莽無窮，郡縣森可記。何必大乘經，始證未了義。寺僧出示《藏經總目》。

雙飛橋

水聲倒挾風力大，隆隆駭人三里外。忽訝雙龍鬬欲飛，鱗甲鬚髯形沛艾。停輿橋上瞰且怯，知是南北兩水會。爭鋒迸力作雷雨，跳沫騰空化煙靄。請君清音閣上坐，聊近茶甌緩衣帶。此聲大有翁繹理，鐘鼓鞀鞀兼箏籥。

由涼風橋過解脫坡大峨石玉液泉

延緣宛轉橋，尋至解脫坡。解脫者何物？止爲涼風多。奇礪立巉巖，古仙題大峨。緣何此山名？寄在石一窠。石側玉液泉，神水古不波。相傳智者師，荆門病維摩。娟娟龍女來，得泉起沈疴。此語吾不信，迹詭乃近魔。要知真實相，無病亦無瘥。

由古德林至四會亭漸至萬年寺

蒼蒼古德林，柏樹千萬輩。屹如修士躬，同抱貞肅態。石路險愈高，巖厓幾向背。泉聲樹影合，亭景真四會。夕陽鋪淺澹，金碧如繡纈。夜色何處來？孤塔入寒靄。

萬年寺宿時同行者陳乙齋廣文張春泉少尉

聖壽萬年寺，意祝延慈算。可憐天火頻，內帑付虛誕。遺構乃塵存，新葺有賓館。黃茗勤老僧，談詩得冷伴。南窗迎清風，亂岫斜日滿。不如開東軒，池水堪漱盥。初月低可捫，歸雲暮來款。紛紛看佛牙，我步殊已嬾。

萬年寺夜得子愚弟京寓書及子敬弟杭州書

荒月落無處，敲門一寺驚。書傳京國遠，夢醒夜山清。河北雖歸馬，江南未洗兵。屢傳清問渥，何以竭愚誠？我醉峨眉月，君觀浙海潮。奇游天下少，閑寄兩人超。宦薄機先息，山深隱孰招。洞庭波靜未，緩緩理歸橈。

念王海樓病

賞契先公舊，論交賤子親。半生清白吏，垂老箸書身。秉鑑觀全蜀，研經有幾人？微言通四始，詩教渡迷津。

古寺羈棲慣，猶聞病未瘥。苦心同佛證，寒硯奈秋何。愧我荒鉛槧，相期狎薜蘿。游蹤堪報慰，詩思滿岷峨。

寄示兒孫

靜中規往游峨眉，臨行始令兒孫知。平生雅有獨游興，恐嬰物務相牽羈。錦城衮衮多官

府，我蟲其間亦殊苦。翩然一杖撥雲煙，勝似雙鞵插塵土。連日放步山轉高，腰腳壯往精神超。閑似白鷗健黃犢，歸來一笑驚兒曹。

寄懷黃壽臣

別來相視鬢霜侵，記著麻衣感不禁。庚戌夏，余銜恤居西湖淨慈寺。君時陳臬，隔日必來視我。共濟有緣萍偶合，深譚無底酒頻斟。形忘爾我如同氣，迹判升沈總一心。莫怪山行不相報，恐君魂夢越遙岑。

忠勤正直帝攸哀，當代疆臣孰與曹。君撫浙時，御賜「忠勤正直」扁額。感遇君真魚得水，陳書我愧鶴鳴皋。目營四海懷同調，肩荷全川念獨勞。步向高峯看星象，杞憂終夜首頻搔。

輓殿

旋螺矜匠巧，輓殿圓似甕。銅冶丈六身，騎象不施鞵。誰見西來時，實事證虛夢。遂因寶相奇，奔走天人衆。婦孺疲道途，香煙絡巖洞。白水餘雙池，澹澹任汲弄。僧徒罕識字，口授有咒誦。神廟昔賜經，荒墜不知重。此寺建何時？相傳晉唐宋。

晨起走觀心坡至息心坡

人面向天天俛臨，兩足正與山相尋。欲上不上步步斟，不墜而墜聲聲吟。傍晚卻顧千厓深，此時何處觀吾心？忽就平夷紓腳力，泉聲歡喜樹秀色。拂石盤陀坐其側，是時我心方識職，欲觀其動觀所息。

華巖頂早飯

叢叢簇簇繞諸嶺，行蒼龍脊乍迴頸。幽林倏忽異光景，乘雲直上華巖頂。中原浩浩幾萬頃，晞暎仿佛見邑井。輿人邪許行轉獷，齋甌香時足力猛。有僧能思貌臞冷，曾棲補陀浮海艇。九華五臺俱目領，萬里歸來此戢影。我雖足迹半行省，若說狂游今始逞。世間千幽萬奇境，幾時到偏心始肯。老頭陀前餉粗茗，謂此妄念卻宜屏。且就近路溯遐迴，我聞此語深自警。瞻高眺深氣一靜，山磬鳴時睡鶴醒。

開山祖殿

昔聞古德言，普賢佛長子。時乘六牙象，行至峨眉止。眷屬三千人，密證普賢旨。寶掌生千歲，設象始供禮。蒲公采藥至，教相復現此。立殿日普光，開山有遺趾。寶掌東周僧，蒲公西京士。普賢來何時？渺渺不可紀。何去亦何來？其來在無始。

通天大師塔陳乙齋云舊有碑題活普賢塔

佛殿莊嚴四百年，當時止爲一通天。普賢已是空空相，塔底何來活普賢？

由鑽天坡至雷洞坪

蛇行虻屬相攀牽，人來鑽天天可憐。線路斗絕四五里，暫憩已是雷洞前。每年六月雷搜殿，電光照見雷公面。洞神逃出露奇形，雨腳斜飛橫怪箭。濛濛下界千萬家，掩耳但聞天鼓過。上方金殿老居士，一竿赤日曬袈裟。

至山頂

八十四盤三倒拐，行人貫魚兼爬蟹。卻愁天近地欲離，似蹋空行得懸解。天門石畔雲側行，太子坪前泉亂灑。山高百產猿鳥絕，地冷千年柏竹矮。盤旋已至峨眉頂，宇宙闊遠視聽改。何必雲容水氣合，孤峯而外都成海。萬形皆下此獨尊，四大真空我安在？多少天人今古思，呵壁從頭叩真宰。

七日宿金頂寺

山勢西來浩不收，蜿蜒到此忽迴頭。玉毫靜放千峯采，金德真先萬國秋。微月帶雲棲獸棟，繁星如雨溼羊裘。此身果在神霄裏，笑煞人間問女牛。

佛光

有佛無佛吾不知，云有佛光今見之。光明若是佛性具，緣何各使人人窺。謂光明中乃有佛，不光明處佛何爲？行人走至光明頂，俯瞰下界懸厓巖。兜羅綿雲萬壑起，一白旋轉如窠